



# Die Aabrennte Fasnacht 2019

Uf Toblerone-Zingge isch syt neuschten d Aisha richtig scharf,  
Well si weiss, dass me die Sünd au hintrem Schleier gniesse darf.  
Nur iire Maa dr Sidi-Abdel findet Halal-Schoggi Stuss,  
Sy Alti seht jetzt nämmlig wien e Lindor-Kugle us.

D Frau Meier frogt im Kindsgi: "Welles Gschichtli fändet iir jetzt glatt?  
S Aschenputtel, s Tischlein deck dich oder d Raupe Nimmersatt?"  
"Die sinn doch langwyylig und doof", rief die Binggis grad im Chor,  
"Liis ys lieber d Reportage us em Spiegel vor."

E Baselworld ganz ohne Swatch Group, nei das goot nit, liebi Lüt,  
Vor Schregg gheist grad unsri Rolex Oyster ins Champagner-Flüte.  
Kei Muba und kei Uhremäss, me merggt, wenn me in d Zuekunft bliggt,  
Dass Basel, statt nur anders, bald scho überhaupt nümme tiggt.

Mir düüse uf Elektro-Trottis grad dr Spaalebärg durab,  
Unde vor em Ullrich links, e Dante rettet sich nur knapp.  
Bim Spiegelhof rennt ys e Schugger noch und schreit ys hässig aa,  
"I schnapp euch, wartet nur, wenn yych my Tesla starte ka."

Uf siner Gala git dr FCB bim Loos-Verkauf bekannt,  
Dass au sy Frauebild vo Anno 1893 stammt.  
Aber s loont sich z inveschiere, jedes Lööslis isch e Gewinn,  
Well alli Niete schliesslig scho bim Club im Vorstand sinn.

Dr Äschbi luegt in Spiegel und stryucht süfzend über syyni Falte,  
Bim Schwizer Fäärnsee wänns en nümme, die diene die Alte dort nümme bhalte.  
Und au als Nääberolle gits kei Job me für dä armi Maa,  
Är hät so gärn no die als Lyyche im Bestatter gha.

Znacht im Bett wälzt sich dr Trump und rief im Schloof: "Melania  
Es isch mer glyych, was jede dänggt, y will mi Muuren ändlig haal!"  
"Är het so rächt", dänggt sini Frau, "und wenn me sy denn fertig het,  
Denn kunnt s höggschde Stück dervo in unser Ehebett."

Hänn Sii au so en Abhörgrät us China scho bi sich dehei?  
Mir meine dordermit kei Billig-Händy vo de Huawei.  
Nei die Gfoor isch no perfider, denn es fliegen ys o Gruus,  
Syt letschem Summer d China-Wanze grad diräggt ins Huus.

E Händy wo me falte ka? Das finde mir jo ganz verreggt.  
Zur Vorbereitig hänn mir grad en Origami-Kurs belegt.  
In Züri syg das Teil e Hit, me klappt dort gärn dr Bildschirm uff,  
So passt bim Selfie ändlig au die groosi Schnuure druff.

Es het glärmt und brielt und quängelet und gstört ganz ooni Noot,  
Drum finde mir ganz klar, e Buschi ghört doch nit in grosse Root  
Wenns kei Rued git muess es wäg, die Loosig isch doch schnäll verzellt,  
Drum wirts Zit dass me dr Joel Thüring usestellt.

Mit 90 Jöörli git sich d Uriella ändlig non e Rugg,  
Und dänggt: "I bring im Liebe Gott jetzt mol das Sproochroor wieder zrug."  
Dr Petrus luegt nur iire Schleier aa und meint: "Du blybsch schön stoo!  
Dr Lagerfäld het gemeint, y darf di so nit yyneloo."

Sit das Schwede-Meitli zeigt het, wo dr Klima-Hammer hängt,  
Weiss e jede, dass in Zuekunft e schöns Wort halt nümme längt.

D 7b vom Bläsi Schuelhuus reist drum jetzt klimaneutral,  
Statt mit Easyjet uf Malle tschumplet me ins Laufetal.

Dr Baschi Dürr legt solidarisch e Perügge uf si Nuss,  
Will sy Schädel gsäächli iim z fescht wie e Landepischten us.

Dr FCB verspricht, e Höheflug gäbs das Joor sicher nit,  
Das hört d Ackermäa und meint, do miech si sälbverständlig mit.  
Au d Schwiizer Nati heig für Uswärts statt em Flugli s Büssli gnoo,  
Me däggt jetzt höggschtens amme no e Doppeladler fliege loo.  
Und in dr Wäbergass herrscht plötzlig sone myschteriösi Rued,  
Hejo, au d Stroosenamsle machen iiri Aaflugschneise zue.

Es verspricht dr Kim Jong Un, well Klimaschutz jetzt Vortritt gniesst,  
Dass är ganz noochhaltig Atomrakete jetzt per Zug verschieest.  
Au dr Prinz Charles meint "No more flying, d Royals mien do Vorbild syy",  
Und klappt mit ärnschtem Blick derzue grad syni Flügel-Ooren yy.  
Numme ein macht do nit mit und mir hänn ys ins Füschtli glacht,  
Dr Markus Somm, het trotz em Klimaschutz en Abflug gmacht.

[www.aabrennte.com](http://www.aabrennte.com)